

U ovom broju, između ostalog, čitajte:

- **Poslovna zajednica jedinstvena: Hitne reforme ključ za oporavak poslovnog ambijenta te dostavljeni zaključci nadležnim institucijama**
- **UPFBiH pozdravlja usvajanje Zakona o fiskalizaciji transakcija u FBiH te očekuje ubrzanje fiskalnih reformi**
- **Otvoreno pismo povodom blokada granica: UPFBiH, VTK BiH i Privredna komora FBiH traže momentalan prekid blokada graničnih prelaza**
- **Obustavljena blokada teretnog saobraćaja na graničnim prelazima**
- **Udruženje poslodavaca u FBiH iskazuje podršku procesu pristupanja BiH Jedinstvenom području plaćanja u eurima (SEPA)**



Poslovna zajednica jedinstvena: Hitne reforme ključ za oporavak poslovnog ambijenta



Na konsultativnom sastanku kojeg je 21. januara 2026. godine u Sarajevu organizovalo Udruženje poslodavaca u FBiH predstavnici poslovnih udruženja i komora razgovarali su o najvažnijim pitanjima za unapređenje poslovnog ambijenta i postigli saglasnost o ključnim prioritetima i neophodnim ekonomskim reformama.

Predstavnici privrednih komora i poslodavačkih udruženja jedinstveni su po pitanju očekivanja i neophodnih reformi s ciljem unapređenja dosta zapostavljenog poslovnog ambijenta. Reforme radno-pravnog zakonodavstva i zdravstvenog osiguranja, fiskalne reforme, reforme po pitanju međunarodne trgovine i poslovanja, digitalizacije, CBAM, SEPE, Moneyvala, finansijskih tokova, tržišta rada, školstva, poslovnih zona, investicija, formalne i neformalne EU integracije, kao i povoljniji administrativno-pravni ambijent, brže prilagođavanje susjednim i drugim tržištima i promjenama u biznis svijetu i drugo jesu pitanja od ključnog interesa za popravljavanje poslovnog ambijenta.

Potpredsjednik i direktor Udruženja poslodavaca u FBiH, Bariša Šušnjar i Mario Nenadić, rekli su nakon sastanka da su posebno teme poput radno-pravnog zakonodavstva, fiskalnih promjena, parafiskalnih nameta i usklađivanja s europskim regulativama među najhitnijim izazovima koji stoje pred bh. ekonomijom.

Šušnjar je rekao da su određeni zakoni u pripremi, te podsjetio da je Zakon o fiskalizaciji transakcija jučer usvojen u Zastupničkom domu Parlamenta FBiH dodajući da privrednici od

tog zakona očekuju velike pomake u suzbijanju sive ekonomije i nelojalne konkurencije te jačanja javnih prihoda i ukupnog standarda bh. stanovnika. Izrazio je zabrinutost zbog kašnjenja BiH u procesu usklađivanja s europskim standardima i pravnim okvirom, posebno u segmentima koji utiču na izvozno orijentisane firme.



"Jedna od bitnih tema su i carinske i špeditorske procedure, gdje očekujemo pojednostavljenje i poboljšanje ovih usluga za privredu i građane. Vidimo i najave prevoznika o mogućim blokadama. Očekuje se i procjena međunarodnog tijela Moneyvala o eventualnom svrstavanju BiH na sivu listu, što bi moglo direktno uticati na privredne i finansijske aspekte poslovanja bh.

kompanija i na ukupnu reputaciju zemlje u međunarodnim finansijskim tokovima" kazao je Šušnjar govoreći o nekim od tema o kojima su diskutovali na sastanku.

Predsjednik Vanjskotrgovinske komore BiH Ahmet Egrlić upozorio je da bi najavljena blokada graničnih prelaza u narednoj sedmici mogla izazvati ozbiljne posljedice za bosanskohercegovačku privredu i njen izvoz, poručivši da Komora podržava zahtjeve domaćih prevoznika, ali ne i radikalne mjere koje ugrožavaju protok robe.



Govoreći o problemima u izvozu i trgovinskim odnosima BiH, Egrlić je naglasio da je jedan od ključnih zahtjeva prevoznika izmjena režima boravka vozača u Europskoj uniji, koji je trenutno ograničen na 90 dana u periodu od 180 dana.

Egrlić je upozorio da su pojedine kompanije iz Europske unije već izrazile zabrinutost zbog potencijalnih blokada, pitajući se da li je BiH pouzdana destinacija za dobavljače. Podsjetio je da čak 73 posto ukupnog bh. izvoza ide na tržište EU, uključujući robu koja se direktno ugrađuje u proizvodne procese u zapadnoeuropskoj industriji.

Govoreći o uvedenim kvotama Srbije na uvoz čelika, Egrlić je rekao da smatra da se taj problem može riješiti bilateralno, diplomatskim putem podsjećajući da je Srbija jedan od najvažnijih vanjskotrgovinskih partnera BiH, uz godišnji izvoz vrijedan oko 1,7 milijardi KM, ali i tržište s kojim BiH ima kontinuirani trgovinski deficit.



Iako je dio preporuka Moneyvala ispunjen, kako je rekao direktor Udruženja banaka BiH Edis Ražanica, tri važne obaveze još nisu izvršene, a tiču se zakona o upravljanju oduzetom, nezakonito stečenom imovinom, zatim Zakona o ciljanim finansijskim sankcijama za terorizam i finansiranje terorizma, te registra stvarnih vlasnika, koji u BiH još nije uspostavljen.

Ražanica je upozorio da opservacijski period ističe već narednog mjeseca i da "pričamo o rokovima koji se mjere ne godinama, nego mjesecima i danima prije ulaska u spomenute rizike za bh. privredu i stanovništvo".

"Još uvijek možemo ispuniti preporuke Moneyvala. U suprotnom bit će direktne posljedice za finansijski sistem, stanovništvo i privredu. Sve transakcije će biti usložnjene i spore, svaka transakcija će biti pod provjerom, zbog čega će doći do usporavanja platnog sistema sa inostranstvom" istakao je Ražanica.

Predsjednik Privredne komore Federacije BiH Mirsad Jašarspahić kao i svi učesnici sastanka naglasili su važnost ovakvih konsultacija. Jašarspahić je posebno bitnim je istakao neriješene izazove u vezi CBAM taksu za energijski intenzivne industrije i rizike u koje bh. privreda ulazi zbog neispunjena postavljenih uslova po ovom osnovu, kao i razvoj infrastrukture kvaliteta proizvoda i preuzimanje EU direktiva.



Privrednici i poslodavci zaključili su da će se donosiocima odluka na svim nivoima vlasti u BiH dostaviti usaglašeni ključni prioriteti koji bi mogli značajno olakšati poslovanje bh. kompanija, unapređenje stranih i domaćih investicija, dugo očekivane promjene na tržištu rada u BiH, pristupanje Jedinstvenom tržištu plaćanja u eurima (SEPA), poboljšanje sistema zdravstvenog osiguranja, zaštite na radu, školstva u kontekstu usklađivanja sa potrebama tržišta rada i uvođenja sistema dualnog obrazovanja, svjesni činjenice da je raspoloživo vrijeme praktično ovaj period do godišnjih odmora, nakon čega ulazimo u izborni period što će sigurno zaustaviti neophodne reforme, odnosno prolongirati ih za duži period što bi privredi bio novi težak udarac.



Dostavljeni zaključci sa konsultativnog sastanka poslodavačkih udruženja i komora



Na konsultativnom sastanku kojeg je 21. januara 2026. godine u Sarajevu organizovalo Udruženje poslodavaca u FBiH, predstavnici poslovnih udruženja i komora razgovarali su o najvažnijim pitanjima za unapređenje poslovnog ambijenta i postigli saglasnost o ključnim prioritetima i neophodnim ekonomskim reformama.

Zaključci sa sastanka dostavljeni su relevantnim institucijama na svim nivoima Bosne i Hercegovine, kao i spisak učesnika sastanka koji očekuju da se pitanja neophodna za rad i razvoj privrede prioritetno riješe.

Zaključke možete pogledati [OVDJE](#), a spisak učesnika [OVDJE](#).

Sastanak predstavnika poslodavačkih udruženja i komora sa šefom Delegacije EU u BiH



Direktor Udruženja poslodavaca u FBiH Mario Nenadić prisustvovao je 12. januara 2026. godine sastanku sa šefom Delegacije EU u BiH Luigiom Sorecom i predstavnicima komora i udruženja na kojem se razgovaralo o prioritetima bh. privrede za tekuću godinu.

Šef Delegacije EU u BiH Luigi Soreca je kazao da je sa bh. poslovnom zajednicom razgovarao o dva ključna pitanja koja imaju značajan utjecaj na poslovnu klimu u BiH i zahtijevaju hitnu pažnju nadležnih javnih organa.

"Prvo pitanje je borba protiv pranja novca i finansiranja terorizma. Neotklanjanje postojećih nedostataka u naredna dva mjeseca moglo bi dovesti do pojačanog međunarodnog nadzora, odnosno stavljanje na sivu listu, što bi uticalo na pristup finansijskim tržištima, strane investicije i učešće u Jedinstvenom području plaćanja u eurima (SEPA). Drugo pitanje odnosi se na važan instrument za smanjenje emisija ugljika – Mehanizam EU za prilagođavanje ugljika na granicama CBAM, koji je u primjeni od 1. januara. Kašnjenja u Bosni i Hercegovini u uspostavljanju sistema za praćenje emisija, izvještavanje, verifikaciju i akreditaciju imaju svoju cijenu, jer povećavaju rizik od viših nameta, gubitka ugovora i narušavanja reputacije. Drago mi je vidjeti da se poslovna zajednica proaktivno angažuje u ovim važnim pitanjima. Pozivamo vlasti u BiH da saslušaju njihove zabrinutosti i poduzmu potrebne mjere" kazao je Soreca.



Predstavnici Udruženja poslodavaca u FBiH također su izrazili svoju zabrinutost činjenicom da duže od dvije godine ukazuju na činjenicu da će se mehanizam primjene i naplate CBAMA pokrenuti 01.01.2026. godine te da nije uloženo dovoljno napora da se spriječe štetne posljedice po privredu Bosne i Hercegovine u smislu udara ovog EU mehanizma na konkurentnost bh. kompanija.

Također je na sastanku pojašnjeno da nisu odobreni nikakvi posebni izuzeci za Bosnu i Hercegovinu unatoč pokušajima po tom pitanju.

Poslodavci su pohvalili napore koji su uloženi s ciljem uvrštavanja Bosne i Hercegovine u SEPA mehanizam što bi sigurno omogućilo olakšano eursko poslovanje bh. kompanijama o čemu su govori predstavnici Udruženja banaka BiH, Centralne banke BiH i drugi učesnici.

Trenutno se puno napora ulaže u usvajanje propisa na državnom i entitetskim nivoima što je preduslov za određene evaluacije i pozitivna mišljenja. Međutim i ovo pitanje prate rizici uvrštavanja Bosne i Hercegovine na sivu listu Moneyvala što bi imalo nesagledive posljedice za bh. izvoznike ali i za pitanja stranih ulaganja i poslovnog okruženja generalno.

Učesnici sastanka su se složili da predstavnici međunarodnih organizacija i institucija očekuje veće zalaganje domaćih vlasti, a posebno uvažavajući činjenicu da su spomenuta pitanja dio i reformske agende, ali i drugih procesa koji se dešavaju u širem okruženju.

Direktor UPFBiH obavijestio je ambasadora i prisutne o prioritetima, prije svega, neophodnim propisima na federalnom nivou koje je potrebno donijeti u oblasti fiskalne reforme, radno-pravnog zakonodavstva, zdravstvenog osiguranja i drugo, kao i o propisima na nivou Bosne i Hercegovine i kantona koji su ozbiljna smetnja olakšanom poslovanju.

Učesnici su na kraju delegirali i pitanje raspolaganja državnom imovinom koje se posebno u posljednje vrijeme javlja kao smetnja ulaganjima u Bosnu i Hercegovinu i zamolili predstavnike Delegacije EU u BiH da u saradnji sa nadležnim vlastima i OHR-om rade na rješavanju ovih pitanja. Ambasador Soreca svjestan uloge poslodavca u sistemu stavio se na raspolaganje poslodavci i pozvao ih da ga redovno ažuriraju o problemima, prioritetima s ciljem njegove intervencije tamo gdje je to dozvoljeno i moguće.

Usvojen Zakon o fiskalizaciji transakcija u FBiH



Na 8. vanrednoj sjednici Doma naroda Parlamenta FBiH održanoj 23. januara 2026. godine usvojen je Prijedlog zakona o fiskalizaciji transakcija FBiH, nakon pojedinačnog izjašnjenja zastupnika. Prijedlog zakona nije imao potrebnu većinu nakon elektronskog izjašnjenja zastupnika, ali je usvojen nakon ponovljenog pojedinačnog glasanja kada su 43 zastupnika bila za, 16 protiv, a 3 suzdržana. Prethodno je na sjednici Zastupničkog doma 20. januara usvojen ovaj prijedlog zakona.

Kako je obrazložila ranije Vlada FBiH kao predlagač, ovim zakonom uređuju se obaveza izdavanja računa, elektronski sistem za evidentiranje transakcija, sistem nadzora u oblasti fiskalizacije transakcija, kaznene odredbe, kao i druga pitanja od značaja za fiskalizaciju na teritoriji Federacije BiH. Svrha ovog zakona je sprečavanje utaje poreza kao posljedice neformalne ekonomije korištenjem tehnoloških sistema koji omogućavaju sigurno prikupljanje i prijenos informacija u realnom vremenu za svaku transakciju na teritoriji Federacije BiH.

Kako je navela Vlada, proces fiskalizacije prometa, odnosno transakcija u privredi Federacije BiH nije nov pojam budući da je sistem fiskalizacije reguliran Zakonom o fiskalnim sistemima donesenim 2009. godine, čija primjena je počela od 2010/2011. godine. Ipak, imajući u vidu da fiskalizacija u svojoj suštini podrazumijeva korištenje savremenih tehničko-tehnoloških rješenja i njenu integraciju u svakodnevno poslovanje subjekata, postojeći pravni okvir pokazao se nedovoljnim za praćenje brzog razvoja informacionih tehnologija i sveobuhvatne digitalizacije poslovnih procesa u privredi, obrazloženo je.

Udruženje poslodavaca u FBiH pozdravlja usvajanje Zakona o fiskalizaciji transakcija u FBiH te očekuje ubrzanje fiskalnih reformi



Udruženje poslodavaca u Federaciji Bosne i Hercegovine pozdravlja usvajanje Zakona o fiskalizaciji transakcija u oba doma Parlamenta FBiH prošle sedmice, te se čeka objavljivanje u Službenim novinama FBiH i zvanično stupanje na snagu ovog zakona.

Usvajanje ovog zakona predstavlja važan iskorak u jačanju fiskalne discipline, suzbijanju sive ekonomije i nelojalne konkurencije u poslovnom okruženju te modernizaciji poslovnog ambijenta u FBiH, a posebno su velika očekivanja poslodavaca od punjenja javnih fondova kroz primjenu ovog zakona. Kao što poslodavci godinama naglašavaju, preskupo poslovno okruženje jedan je od ključnih razloga sporog razvoja, nedovoljnih domaćih i stranih investicija i otežanog poslovanja, a s druge strane institucije vlasti najavljuju da će ovaj zakon doprinijeti, između ostalog i punjenu budžeta, ali i omogućiti ulazak u drugu fazu rasterećenja privrednog poslovanja.

Udruženje poslodavaca u FBiH je već godinama, otkako je počela sa radom radna grupa za pripremu pomenutog zakona, aktivno učestvovalo u procesu njegove izrade kroz rad Pravnog i Ekonomskog savjeta Udruženja i drugih stručnih tijela UPFBiH zaduženih za pripremu prijedloga i komentara na Zakon, kojom prilikom su obavljene brojne interne konsultacije i sastanci sa predstavnicima Ministarstva finansija FBiH i brojnih drugih aktera u pripremi Zakona, a tokom ukupnog procesa pripreme ovog važnog Zakona, Udruženje je kontinuirano dostavljalo ogroman broj sugestija, primjedbi i prijedloga UPFBiH s ciljem unapređenja zakonskog teksta i uvođenja dodatnog reda u poslovanje. Ministarstvo finansija FBiH uvažilo je

u fazi pripreme Zakona veliki broj preporuka poslodavaca koje su ugrađene u konačni tekst čime je isti dodatno poboljšán, dok je manji dio prijedloga dodatno inkorporiran kroz amandmansko djelovanje u parlamentarnoj proceduri.

Zakon nije idealan iz pozicije poslodavaca, ali je svakako važan korak u sveobuhvatnoj reformi sistema fiskalizacije koji treba da ima za cilj izgradnju modernog, digitalnog i transparentnog fiskalnog okvira u FBiH, te očekujemo ubrzanu implementaciju Zakona, donošenje podzakonskih akata i vidljive i mjerljive efekte u što kraćem roku.

Buduće djelovanje socijalnih partnera, odnosno vlasti, poslodavaca i sindikata mora biti usmjereno u dalje rasterećenje privrede i razvoj kroz jačanje konkurentnosti domaćih kompanija i obrta, te stvaranja uslova za produktivnije poslovanje i bolju poziciju poslodavaca i radnika u sistemu.

Udruženje poslodavaca u FBiH i dalje nadležnim vlastima stavlja na raspolaganje svoje kapacitete, svjesni važnosti ubrzanja ove reforme kako za poslovanje, tako i za rad i radno-pravne odnose u kompanijama, ali i za ukupnu socijalnu politiku u društvu.


UPFBiH: Usvajanje finansijskih zakona ključan je iskorak ka europskim integracijama

Udruženje poslodavaca u Federaciji BiH pozdravlja napore Vlade Federacije BiH u smislu usvajanja obuhvatnog paketa reformskih zakona iz oblasti finansijskog poslovanja.

Usvajanjem na Vladi FBiH Zakona o platnim uslugama, Zakona o računima za plaćanje, Zakona o elektronskom novcu, izmjena i dopuna Zakona o zaštiti korisnika finansijskih usluga, izmjena i dopuna Zakona o mikrokreditnim organizacijama te dopuni Zakona o bankama, a nakon usvajanja na Parlamentu FBiH, bit će osigurani neophodni preduslovi za pristupanje Jedinostvenom europskom platnom području (SEPA), što predstavlja važan iskorak za privredu, građane i europski put BiH. Ovo je dio pitanja koje privreda i poslodavci odavno naglašavaju kao ključni prioritet za unaprijeđenje konkurentnosti i poslovanja, kako prekograničnog tako i unutar FBiH i BiH.

Usvojeni set zakona predstavlja modernizaciju finansijskog okvira u FBiH i donosi praktične i dugoročno značajne prednosti, odnosno brže i jeftinije transakcije, veći nivo sigurnosti i

usklađivanje domaćih propisa sa europskim standardima te očekujemo da Zastupnički dom Parlamenta FBiH u što kraćem roku potvrdi ovaj reformski paket kako bi proces bio kompletiran na nivou Federacije.



Poslodavci ističu da će nakon usvajanja ovih zakona na Parlamentu FBiH, Federacija BiH završiti svoj dio obaveza prema SEPA integraciji, te da ćemo s pažnjom pratiti naredne korake institucija u entitetima i na nivou Bosne i Hercegovine u ovom pravcu. Budući da je riječ o jedinstvenom platnom prostoru, neophodno je da sve nadležne institucije u državi i entitetima završe potrebne aktivnosti kako bi BiH pravovremeno okončala ovu fazu integracije. Međutim, za potpuno ispunjenje međunarodnih obaveza i izbjegavanje uvrštavanja BiH na MONEYVAL "sivu listu", ključno je da institucije na nivou Bosne i Hercegovine hitno usvoje i Zakon o oduzimanju i upravljanju imovinom i Zakon o ciljanim finansijskim sankcijama za terorizam, finansiranje terorizma i proliferaciju oružja za masovno uništenje.

Usvajanje ovih zakona, kao i očekivanog usvajanja Zakona o finansijskim transakcijama u FBiH i Zakona o deviznom poslovanju, predstavlja minimum potrebnih koraka kako bi BiH zadržala finansijsku stabilnost, kredibilitet i izbjegla ozbiljne posljedice uvrštavanja na "sivu listu", što bi direktno pogodilo privredu, bankarski sektor i međunarodne transakcije.

Udruženje poslodavaca u Federaciji BiH skupa sa komorama i drugim poslovnim udruženjima i organizacijama, stavlja svoje kapacitete na raspolaganje za pripremu, unapređenje i implementaciju ovih propisa.

Smatramo da ovi naponi predstavljaju snažnu poruku da Federacija BiH ima ozbiljnu namjeru da modernizira finansijski sektor, unaprijedi poslovno okruženje i ubrza europske integracije.

**Otvoreno pismo povodom blokada granica:
Udruženje poslodavaca u FBiH,
Vanjskotrgovinska/Spoljnotrgovinska komora
BiH i Privredna komora FBiH traže
momentalan prekid blokada graničnih prelaza**



Udruženje poslodavaca u Federaciji Bosne i Hercegovine, Vanjskotrgovinska/Spoljnotrgovinska komora Bosne i Hercegovine i Privredna komora Federacije Bosne i Hercegovine izražavaju razumijevanje za probleme s kojima se suočavaju prevoznici jer su izazovi koje trpe prevozničke kompanije u suštini problemi svih privrednika u Federaciji BiH i Bosni i Hercegovini koji se bave prekograničnim poslovanjem.

Već gotovo dvije godine poslovna zajednica kontinuirano upozorava na poteškoće u prekograničnom poslovanju, posebno u vezi s boravkom vozača i radnika u Šengenskoj zoni. Nažalost, uprkos brojnim inicijativama i apelima, ovo pitanje do danas nije sistemski riješeno.

Istovremeno, jasno je da aktuelne blokade saobraćaja nanose najveću štetu upravo domaćoj privredi i privrednicima. Iako u ovom trenutku nije moguće precizno procijeniti ukupne gubitke, prema informacijama koje dobijamo od naših članica, riječ je o milionskim iznosima, koje i inače ranjiva privreda Bosne i Hercegovine teško može podnijeti.

Aktuelne blokade nose i ozbiljan rizik prekida lanaca snabdijevanja što neminovno vodi ka poskupljenju roba na tržištu Federacije BiH. Istovremeno, već sada se otvara prostor za

pokretanje privrednih sporova zbog šteta koje su nastupile, a ukoliko se blokade nastave, razmjeri tih šteta bit će znatno veći. Sve ove posljedice u konačnici padaju na teret privrednika i građana.



Januar je početak poslovne godine, vrijeme realizacije planova i ugovorenih obaveza te pozivamo na obustavu blokada, povratak redovnim privrednim tokovima, te istovremeno na snažniji i koordiniran pritisak

prema nadležnim institucijama kako bi se ovo pitanje konačno i trajno riješilo. U tom smislu, obraćamo se organizatorima protesta, nadležnim vlastima, predstavnicima europskih institucija kao i svim drugim relevantnim akterima koji mogu doprinijeti pronalasku rješenja da se legitimna prava prevoznika i privrednika konačno i sistemski uredi.

Problem nije među privrednicima i prevoznicima. Međutim, očigledno je da je fokus odgovornosti prebačen upravo na njih, što dodatno produbljuje štete i podjele unutar poslovne zajednice. Stoga pozivamo sve aktere na odgovornost, razumijevanje i traženje pragmatičnih rješenja u postojećim okolnostima.

Još jednom naglašavamo da u potpunosti razumijemo težinu situacije u kojoj se nalaze prevoznici. Svi smo dio iste privrede i suočeni s istim izazovima. Štete nastale uslijed daljnjih blokada niko neće nadoknaditi, zbog čega je u ovom trenutku ključno da se okrenemo dijalogu, solidarnosti i zajedničkom djelovanju s ciljem smanjenja rizika i očuvanja stabilnosti privrednih tokova.

Obavještenje o stupanju na protest poduzetnika Velika Kladaša u cilju zastavljanja trenutnih neustavnih blokada granica



Udruženje poslodavaca Velika Kladaša uputilo je službeno obavještenje o stupanju na protest poduzetnika Velika Kladaša u cilju zastavljanja trenutnih neustavnih blokada granica.


Kako navode u dopisu, trenutnim blokadama graničnih graničnih prelaza u BiH privrednicima se onemogućava redovno poslovanje što dovodi do velikih finansijskih gubitaka, ugrožava egzistenciju zaposlenih i narušava pravnu sigurnost. Ističu da ovakvo stanje predstavlja povredu Ustava FBiH člana II. A kojim se Federacija BiH obavezuje da osigura najviši nivo međunarodno priznatih ljudskih prava i osnovnih sloboda, uključujući pravo na rad.

Ustav FBiH, putem Aneksa koji preuzima međunarodne konvencije, garantuje pravo svakom licu da slobodno radi i privređuje, dok se trenutnim blokadama onemogućava izvoz robe, izvršenje ugovornih obavaza i ostvarivanje prava na rad i egzistenciju velikog broja privrednih subjekata i njihovih zaposlenika.

Udruženje poduzetnika Velike Kladaše daje rok od 24 sata za prestanak stanja koje onemogućava normalno odvijanje privrednih aktivnosti, a ukoliko se blokade ne uklone u navedenom roku, obavještavaju da će poduzetnici stupiti u proteste.

Cijelo obavještenje pročitajte [OVDJE](#).

Zahtjev Udruženje poduzetnika Općine Velika Kladaša za hitnu deblokadu GP Maljevac i zaštitu ustavnog prava na rad



Udruženje poduzetnika Općine Velika Kladaša uputilo je 30. januara 2026. godine predsjedavajućoj Vijeća ministara BiH, premijeru Vlade FBiH i premijeru USK zahtjev za hitnu deblokadu GP Maljevac i zaštitu ustavnog prava na rad.

U dopisu je naglašeno da se Udruženje obraća povodom kontinuiranih i nelegalnih blokada graničnih prelaza, a posebno Graničnog prelaza Maljevac, koje su dovele do ozbiljnih poremećaja u poslovanju privrednih subjekata, značajnih finansijskih gubitaka te ugrožavanja velikog broja radnih mjesta.

Navedenim blokadama privrednicima se direktno uskraćuje ustavom zagarantovano pravo na rad, propisano članom II.A Ustava Bosne i Hercegovine, kao i pravo na slobodno kretanje roba. Posljedice su već vidljive kroz višemilionske gubitke, prekid lanaca snabdijevanja, nemogućnost realizacije ugovorenih obaveza i realnu opasnost od smanjenja broja zaposlenih.

Posebno ističu da trenutne blokade nemaju odobrenje nadležnog Ministarstva unutrašnjih poslova, zbog čega su iste nezakonite. Njihovo dalje tolerisanje ne doprinosi rješavanju problema, već proizvodi isključivo dodatnu i sve veću štetu privredi, destabilizuje poslovno okruženje i narušava pravnu sigurnost.

Dodatno naglašavaju da je Europska komisija, putem zvaničnog pisanog akta iz Brisela,

donijela odluku o pokretanju procesa izmjene statusa vozača, čime je jasno potvrđeno da se ova problematika rješava institucionalnim putem. U takvim okolnostima, svaka daljnja blokada granica predstavlja neopravdan i direktan udar na privredu i ekonomski sistem Bosne i Hercegovine.

Ukoliko se postojeće stanje hitno ne zaustavi, realno je očekivati dalju eskalaciju nezadovoljstva privrednika i zaposlenih, uključujući šire oblike građanskog pritiska i ozbiljne poremećaje u funkcionisanju ekonomskog i institucionalnog sistema, za šta odgovornost ne može snositi privredni sektor koji već trpi najveće posljedice.

S tim u vezi, zahtijevaju odmah uklanjanje svih nelegalnih blokada, neodložnu deblokadu Graničnog prelaza Maljevac i sprječavanje daljih blokada granica, radi zaštite privrede, radnih mjesta i ukupne ekonomske stabilnosti države.

Dopis pročitajte [OVDJE](#).

U sjedištu Vlade Federacije BiH održan sastanak s predstavnicima Konzorcijuma „Logistika BiH“

Predstavnici Vlade Federacije Bosne i Hercegovine održali su 30. januara 2026. godine, u sjedištu Vlade Federacije BiH u Sarajevu, sastanak s predstavnicima Konzorcijuma „Logistika BiH“. Na sastanku su prisustvovali i predstavnici Federalne uprave za inspeksijske poslove i Udruženja poslodavaca u FBiH.

Razgovarano je o aktivnostima na rješavanju problema transportnih kompanija Bosne i Hercegovine koji rade na području Europske unije na kojem su usaglašeni i doneseni zaključci.

Tako je prvim zaključkom istaknuto da je Vlada Federacije BiH, prethodno svojim zaključkom V. broj: 1395/2025, pružila podršku u donošenju Pravilnika o povratu akcize i uvođenja zajedničkog taga na području Bosne i Hercegovine, a s ciljem povoljnijeg korištenja mreže autoputeva kroz Bosnu i Hercegovinu.

Također je zaključeno da će premijer Federacije BiH u ime Vlade Federacije BiH ponovo uputiti urgenciju ka Vijeću ministara BiH, a u vezi sa realizacijom prethodnog zaključka, kao i održati tematsku sjednicu Vlade Federacije BiH, te inicirati i parlamentarnu raspravu.



Vlada Federacije BiH će nastaviti jačati kadrovske kapacitete Federalne uprave za inspeksijske poslove, s ciljem smanjenja zadržavanja i ublažavanja zastoja na graničnim prelazima i mjestima carinjenja, čime će se osigurati brža i efikasnija provedba inspeksijskih kontrola.

Zaključeno je i da će Ekonomsko - socijalno vijeće za teritoriju Federacije BiH na narednoj sjednici, a na prijedlog Vlade Federacije BiH, razmatrati problematiku transportnih kompanija Bosne i Hercegovine koje rade na području Europske unije.

Vlada Federacije BiH će, vezano uz zahtjeve prevoznika koji nisu u njenoj nadležnosti, inicirati sastanke sa relevantnim institucijama Bosne i Hercegovine s ciljem pružanja podrške u rješavanju ove problematike.

Utvrđeno je i da će, s ciljem analize realizacije ovih zaključaka, predstavnici Vlade Federacije BiH i Konzorcijuma „Logistika BiH“ održati novi sastanak u narednih 15 dana.

Obustavljena blokada teretnog saobraćaja na graničnim prelazima



Prevoznici iz Bosne i Hercegovine obustavili su 30.01.2026. blokade teretnog saobraćaja na graničnim prelazima. Prema riječima jednog od koordinatora Konzorcijuma "Logistika BiH" Marka Ivanovića, odluka je donijeta nakon što su dobijene garancije Brisela da se na vozače neće primjenjivati pravilo 90/180 dana boravka u Europskoj uniji.

"Dobili smo i garancije entitetskih vlada da će naši zahtjevi biti ispunjeni", dodao je Ivanović.

Prethodno su odluku o prestanku blokade donijeli i prevoznici iz Srbije, Crne Gore i Sjeverne Makedonije, koji su zajedno sa prevoznicima iz BiH od ponedjeljka obustavili teretni transport na granicama sa EU.

Glavni koordinator Konzorcija logistika Bosne i Hercegovine Velibor Peulić rekao je da je odluka o prestanku blokade donesena nakon sastanka s premijerom FBiH Nerminom Nikšićem u Vladi FBiH, a kojem su prisustvovali i predstavnici Federalne uprave za inspeksijske poslove i Udruženja poslodavaca u FBiH.

Peulić je kazao da će sada, na osnovu saradnje Konzorcija logistike BiH sa entitetskim vladama i Vijećem ministara BiH, početi s implementacijom ranije postignutih dogovora u skladu s regionalnim pristupom svih država u okruženju.

Predstavници UPFBiH održali sastanak sa ministricom civilnih poslova BiH Dubravkom Bošnjak



Na poziv Udruženja poslodavaca u FBiH, ministrica civilnih poslova BiH Dubravka Bošnjak posjetila je UPFBiH. Sastanku je pored ministrice prisustvovao i šef Kabineta Davor Bošnjak, a ispred UPFBiH direktor Mario Nenadić, član ESV-a FBiH Adnan Smailbegović, predsjednik Udruženja poslodavaca KS Suhad Ećo i saradnici.

Tokom sastanka, predstavnici Udruženja upoznali su ministricu Bošnjak o aktivnostima Udruženja tokom 2025. godine i prioritetima za tekuću godinu. U vezi sa okvirnim nadležnostima Ministarstva civilnih poslodavca BiH poslodavci su ukazali da su pitanja rada i zapošljavanja, pored fiskalnih reformi, i dalje ključni interesi u poslovnom okruženju. Govorilo se o važnosti pitanja Prijedloga zakona o posredovanju u zapošljavanju i socijalnoj sigurnosti nezaposlenih osoba, Zakona o zapošljavanju stranaca u FBiH, Zakona o radu i drugo. Zakoni su u zakonodavnoj proceduri i Udruženje očekuje od svih aktera da će FBiH nakon godina čekanja konačno dobiti propise koji su od interesa za sve socijalne partnere, odnosno, poslodavce, sindikate i vlasti.

Sistem školstva u FBiH nije usklađen sa potrebama tržišta rada pri čemu se još uvijek čekaju zakoni o dualnom obrazovanju te unapređenje programa prekvalifikacije, dokvalifikacije i obuke u svrhu osposobljavanja radnika za rad u okruženju koje iziskuje moderno tržište rad.

Propisi iz oblasti zdravstvenog osiguranja u FBiH i pored najava još uvijek nisu izmijenjeni tako da najveći teret troškova bolovanja i liječenja i dalje preuzimaju poslodavci.

Socijalna zaštita je veliki izazov u FBiH, a poslodavci su ukazali na problem nesrazmjernog broja evidentiranih nezaposlenih u odnosu na stvarni broj radnika raspoloživih na tržištu rada u FBiH. Razmijenjena su također mišljenja i iskustva vezano za zaključivanja sporazuma o socijalnoj zaštiti koje BiH ima sa drugim zemljama te su poslodavci naglasili važnost unapređenja koordinacija na državnom nivou za oblasti zdravstva, školstva, socijalne zaštite, rada i zapošljavanja kako prema entitetima u BiH tako i prema međunarodnim subjektima.

Razgovaralo se i o izazovima Bosne i Hercegovine u okviru EU integracija, posebno o važnosti usklađivanja zakonodavstva na svim nivoima sa propisima EU pri čemu su u ovom trenutku za poslodavce posebno važna pitanja CBAM-a, SEPA, ESAP, rad bh. državljana u zemljama EU i drugo.

Ministrica Bošnjak pohvalila je dobre odnose sa Udruženjem poslodavaca u FBiH te ažurirala informacije koje su od interesa za unapređenje poslovnog okruženja u FBiH pri čemu je naglasila brojne izazove kada se radi o saradnji sa institucijama na nivou entiteta, kantona i drugo. Pozvala je Udruženje na saradnju u pripremi i implementaciji određenih programa i projekata i stavila na raspolaganje kapacitete Ministarstva. Također je naglasila važnost aktivne uloge Udruženja poslodavaca u FBiH kada je riječ o predstojećem procesu EU integracija i očekivanog napretka BiH, te sudjelovanja i aktivnog odnosa prema pitanjima o kojima se razgovaralo tokom sastanka.

Udruženje poslodavaca u FBiH iskazuje podršku procesu pristupanja BiH Jedinstvenom području plaćanja u eurima (SEPA)

Udruženje poslodavaca u FBiH izražava punu podršku provedenim i tekućim aktivnostima u procesu pristupanja Bosne i Hercegovine Jedinstvenom području plaćanja u eurima (SEPA). Ovaj važan proces predstavlja ključnu priliku za očuvanje i unapređenje konkurentnosti bh. ekonomije, pa tako i za građane, jer će donijeti značajnu uštedu u troškovima prekograničnih novčanih transakcija.

Prema izjavama guvernerke Centralne banke BiH Jasmine Selimović, Centralna banka BiH je 12. decembra 2025. godine obavijestila nadležne institucije Europske unije o završenoj predaplikaciji za članstvo u SEPA-i te da tačan datum podnošenja konačne aplikacije zavisi isključivo od usvajanja potrebne, trenutno nedostajuće regulative u entitetima.

S obzirom na trenutnu situaciju u kojoj su troškovi prekograničnih plaćanja u BiH značajno viši nego u zemljama članicama SEPA, svaka odgoda ovog procesa negativno se odražava na našu privredu, ali i na život građana, te stoga pozivamo sve nadležne institucije na nivou BiH i entiteta, da se posvete završetku procesa pristupanja SEPA-i. Ovaj proces prije svega zahtijeva donošenje ključne regulative na entitetskom nivou, koja je trenutno prepreka za finalizaciju pristupanja, ali od njenog usvajanja zavisi ubrzani razvoj privrede, smanjenje poslovnih troškova i unaprijeđenje konkurentnosti bh. privrede, posebno na inotrižištu.



Pozivamo sve političke i ekonomske aktere da prepoznaju dugoročnu vrijednost ovog koraka za našu ekonomiju, koji neće samo smanjiti troškove prekograničnih transakcija, već će omogućiti bržu integraciju naše zemlje na tržište Europske unije, privući strane investicije i smanjiti ovisnost o neformalnim kanalima plaćanja.

Pristupanjem SEPA-i, naši građani i privreda će uživati u jednakim uslovima za domaće i međunarodne transakcije, čime će se značajno smanjiti administrativne financijske naknade za dolazne i odlazne transfere, što doprinosi atraktivnosti našeg tržišta za domaće i strane investitore, kroz omogućavanje efikasnijeg i jeftinijeg platnog sistema privrednom sektoru i građanstvu općenito.

Direktor UPFBiH prisustvovao prezentaciji poslovnih rezultata Energoinvesta



Članica Udruženja poslodavaca u FBiH Energoinvest d.d. održala je 29. januara prezentaciju preliminarnih poslovnih rezultata za 2025. godinu, koji su, prema dostupnim pokazateljima, najuspješniji poslovni rezultati Energoinvesta u posljednjih 30 godina i predstavljaju jasnu prekretnicu u daljem razvoju kompanije. Prezentaciji je prisustvovao i direktor UPFBiH Mario Nenadić.

Ostvareni rezultati potvrđuju finansijsku stabilnost, uspješno provedenu stratešku transformaciju i snažno ponovno pozicioniranje Energoinvesta na regionalnom i međunarodnom tržištu, u skladu s njegovom historijskom ulogom i reputacijom.

"Nakon gotovo tri decenije, Energoinvest se danas ne obraća javnosti da bi govorio o opstanku, već o rastu. O rastu koji nije došao slučajno, već kao rezultat teških, ali odgovornih odluka, systemske konsolidacije i jasne vizije budućnosti. Kada sam došao u kompaniju, malo je ljudi vjerovalo da Energoinvest uopšte ima budućnost. Bili smo otpisani, zanemareni, a radnici u dubokoj neizvjesnosti, jer godinama su se u medijima objavljivale priče o tamnim oblacima nad Energoinvestom, o sumnjivim prodajama imovine, neisplaćenim platama i rasprodaji onoga što je generacijama građeno. Danas je slika drugačija. Danas vijesti o Energoinvestu govore o rastu, zapošljavanju, zatvaranju štetnih ugovora i otvaranju novih prilika, izgradnji strateških partnerstava i odgovornom odnosu prema društvu u kojem poslujemo. Danas, kada sa velikim ponosom stojim pred vama, mogu jasno i odgovorno reći: Energoinvest se vratio", rekao je direktor Energoinvesta Mirza Ustamujić.

Ustamujić je kazao da zaposlenici ove kompanije imaju najviše plate u svom sektoru, da su zatvoreni štetni ugovori te da su uspostavljena strateška partnerstva. Kako je naglasio, prosječna neto plaća iznosi 3.200 KM, a najviše su rasle najniže plate radnika ove firme. Također tvrdi da je vrijednost kompanije povećana za 36 miliona KM.

Prisutnima se obratio i federalni ministar energije, rudarstva i industrije Vedran Lakić.



"Čestitke Mirzi Ustamujiću, direktoru Energoinvesta, njegovim saradnicima, članovima Nadzornog odbora i sve i jednom uposleniku koji su dali i energiju i znanje i volju da posrnulu firmu dovedu u situaciju da ima najbolje rezultate poslije 30 godina. 15 miliona dobiti vjerovatno niko nije očekivao, ali smo ljubomorno čuvali sve

ove rezultate da bi došli do ovog svečanog trenutka njihove prezentacije. Dosta je bilo napadanja, komunikacije koja nije bila opravdana, u tišini rad koji je bio od strane Uprave i Nadzornog odbora na kraju je pokazao da se rad isplatio višestruko", kazao je Lakić.

Na događaju je jasno artikulisani mogućnosti i vizija budućnosti Energoinvesta kao moderne, stabilne i međunarodno relevantne poslovne kompanije koja može biti posvećena razvoju domaće privrede, energetskeg sektora i industrije, odnosno ukupnog ekonomskog napretka Bosne i Hercegovine.

Predstavници UPKS održali sastanak sa ministrom komunalne privrede, infrastrukture, prostornog uređenja, građenja i zaštite okoliša KS



Predstavnici Udruženja poslodavaca Kantona Sarajevo održali su 13. januara 2026. godine sastanak sa ministrom komunalne privrede, infrastrukture, prostornog uređenja, građenja i zaštite okoliša KS Mladenom Pandurevićem na kojem se raspravljalo o dvije aktuelne teme, odnosno o donošenju Zakona o izmjenama i dopunama Zakona o komunalnoj čistoći i Zakona o upravljanju zajedničkih dijelovima stambenih zgrada.

Izmjene i dopune Zakona o komunalnoj čistoći delegirane se od strane Udruženja poslodavaca KS još prije više od deset godine, a ključni cilj jeste ispraviti nepravedne i nelogične odredbe kojima je uređeno pitanje komunalne čistoće. O ovim pitanjima posebno su govorili predsjednik UPKS Suhad Ećo, ali i članovi radnih tijela pri Ministarstvu koja su tokom naznačenog perioda radili na pripremi novih rješenja.

Ministar je informisao predstavnike Udruženja o aktivnostima koje je provodilo Ministarstvo putem Radne grupe i nadležnih instituta i koji su dali stručni stav i preporuku za uređenje ovih pitanja. Prethodno su Radnu grupu činili članovi Muhamed Žero, Enver Malagić, a odnedavno i Almedin Kadrić. Udruženje je zadovoljno predloženim rješenjima iako će konkretni efekti biti poznati tek nakon donošenja i odgovarajućih podzakonskih akata i kriterija, ali ono što je najvažnije u ovom trenutku jeste da će budući obračuni i naplata za uslugu prikupljanja, odvoza i deponovanja otpada, u slučaju kada je korisnik usluge pravno lice ili lice koje obavlja

samostalnu djelatnost i koristi poslovni objekat ili dio poslovnog objekta za obavljanje registrovane djelatnosti osnovica za obračun naknade utvrđivat prema količini prikupljenog, odvezenog i deponovanog otpada, ukoliko korisnik usluge osigura vlastiti zatvori sistem odlaganja otpada i zaključi ugovor sa komunalnim preduzećem, a u



suprotnom, prema ukupnoj bruto površini poslovnog objekta i poslovnog dijela stambeno-poslovnog objekta izraženoj u kvadratnim mjestima. Za objekte površine do 30 kvadratnih metara koji se koriste za obavljanje registrovane djelatnosti prijedlog predviđa da se naknada usluge prikupljanja, odvoza i deponovanja otpada određuje u paušalnom iznosu. Zakonom se također predviđa unapređenje u slučaju ako se objekat ne koristi, korisnik usluga bit će dužan plaćati paušalnu naknadu za komunalne usluge za period trajnog nekorištenja, a što se utvrđuje pisanim podneskom korisnika usluga i određenim dokaznim postupkom koji je također propisan, a što podliježe kontroli od strane nadležnog komunalnog preduzeća.

Predstavnici Udruženja poslodavaca KS podržali su napore Ministarstva da se ovo pitanje uredi i obzirom da je Vlada već utvrdila prijedlog ovog zakona zatraženo je da se isti što prije nađe na dnevnom redu Skupštine KS sa ciljem razmatranja i usvajanja.

Druga dogovorena tačka dnevnog reda bila je pitanje donošenja novog Zakona o upravljanju zajedničkih dijelova zgrada u KS kojom prilikom je ministar informisao poslodavce o određenim aspektima unapređenja ovih pitanja u odnosu na pitanja nadležnosti lokalne samouprave u Kantonu, usklađivanja sa odlukom Ustavnog suda i neophodnim i očekivanim promjenama na terenu. Razgovaralo se i o pitanjima naknade građana za upravljanje zajedničkim dijelovima stambenih zgrada, a koje nisu mijenjanje od 2002. godine i nisu usklađene sa promjenama na tržištu u odnosu na cijene roba i usluga. Govorilo se i o pitanjima certificiranja upraviteljskih kompanija, o mogućnostima podrške javnih institucija i budžeta bilo EU ili domaćih organizacija vezano za pitanje objave fasada, liftova u stambenim zgradama, zajedničkih instalacija i ukupnog standarda građana. Ministar je obavijestio predstavnike poslodavaca da je i ovaj zakon u završnoj fazi pripreme i da će biti predložen Vladi za daljnju proceduru.

Učesnici sastanka pohvalili su dobru saradnju UPKS i Ministarstva te najavili aktivno uključivanje u rješavanje svih pitanja vezano za široke nadležnosti tog ministarstva.

Sastanak predstavnika Udruženja poslodavaca u FBiH i Ministarstva civilnih poslova BiH



Predstavnici Udruženja poslodavaca u FBiH i Ministarstva civilnih poslova BiH održali su 23. januara 2026. godine sastanak na kojem je razgovarano o mogućnostima unapređenja međusobne saradnje, s posebnim fokusom na organizovanje informativnih i edukativnih radionica za privrednike u okviru programa EaSI (Employment and Social Innovation). Sastanku su ispred UPFBiH prisustvovali direktor Mario Nenadić, sekretar Mersiha Jusić te pravnik Amra Duvnjak Halilović, a ispred Ministarstva civilnih poslova pomoćnica ministricice Ljiljana Jurak i viši stručni saradnik Adnan Jasnika.

Tokom sastanka razmatrane su potrebe privrednog sektora, potencijalne teme radionica, kao i modeli zajedničke organizacije i promocije aktivnosti namijenjenih poslodavcima i poduzetnicima u Federaciji BiH. Poseban naglasak stavljen je na jačanje informisanosti privrednika o mogućnostima koje EaSI program pruža u oblasti zapošljavanja, socijalne uključenosti i unaprjeđenja radnih uvjeta.

Obje strane izrazile su spremnost za nastavak saradnje kroz konkretne zajedničke aktivnosti koje će doprinijeti jačanju kapaciteta privrednog sektora i boljoj iskorištenosti dostupnih europskih programa i fondova.

CBAM regulativa

Informacija i podaci iz ovog priopćenja se primarno odnose na proizvode od aluminija, čelika i željeza, uz kratki osvrt na ostale proizvode koji podliježu CBAM regulativi, kao i na opća pravila. Svrha ovog dokumenta je pružiti dovoljno osnovnih informacija domaćim prerađivačima, odnosno proizvođačima ovih skupina proizvoda, kao i upoznati širu javnost o teretu samog CBAM-a na domaću privredu i industriju.

Mehanizam za ugljičnu prilagodbu na granicama, poznatiji kao CBAM, predstavlja paket propisa koje je donijela Europska unija u svrhu sprečavanja izmještanja dijela industrije izvan područja Europske unije. Za potrebe shvaćanja CBAM regulative i logike koja utječe na način obračuna emisija, kao i na cijenu CBAM certifikata, potrebno je spomenuti sustav trgovanja emisijskim jedinicama stakleničkih plinova unutar Unije (**ETS sustav**). Naime, jedan dio industrije s područja Europske unije već duži niz godina ima obvezu plaćanja tzv. dozvola za emitiranje CO₂, odnosno ETS dozvola, a koje obveznici sustava ETS-a kupuju na odgovarajućoj burzi, po volatilnim cijenama koje su posljedica nivoa potražnje, kao i dostupnog broja besplatnih dozvola za emitiranje koje se postepeno ukidaju.

Takav sustav je imao za posljedicu smanjenu konkurentnost dijela industrija s područja Unije u odnosu na treće zemlje koje nemaju tu vrstu financijskog opterećenja za vlastita industrijska postrojenja. Upravo zbog takvih razloga, CBAM regulativa je dobila snažnu podršku i poticaj iz kruga europskih proizvođača čelika, a čija je praktična primjena započela s početkom 2026. godine.

Naime, svi **uvoznici CBAM proizvoda** (čelik, željezo, aluminij, vodik, umjetna gnojiva i električna energija) imaju obvezu prijave i predaje CBAM certifikata za sve količine koje su uvezli tokom 2026. godine **u Carinsko područje Unije**, osim ako se radi o količinama manjima od **50 tona** (*de minimis* izuzeće). Što se tiče administrativnog i financijskog opterećenja za uvoznike u Uniju, sama 2026. godina zahtjeva od uvoznika da dobiju status **ovlaštenog CBAM deklaranta** najkasnije do 31.3.2026. godine – radi se o administrativnom postupku koji se vodi kod nacionalnih tijela Carine svake od države članice EU.

U tom smislu je 2026. godina svojevrsna **iznimka**, kao prva godine primjene, jer uvoznici CBAM proizvoda nemaju administrativne i financijske obveze tokom trajanja 2026. godine, već su iste prolongirane za 2027. godinu – radi se o olakšici koja bi trebala smanjiti rizik od eventualnih zastoja i poteškoća kod prve godine primjene CBAM-a. Međutim, ova vrsta „prolongacije“ ne oslobađa robu koja se uvozi na područje Unije u 2026. godini, već isključivo pomjera dospijee svih obveza za predajom i plaćanjem CBAM certifikata.

Za robu koja je uvezena tokom 2026. godine, uvoznici (CBAM deklaranti) imaju rok do **30.9.2027. godine** kako bi prijavili i predali odgovarajuću količinu **CBAM certifikata**. Potrebna količina CBAM certifikata, a time i pripadajući trošak, posljedica su sljedećih faktora:

1. **Vrijednosti direktnih emisija** koje su „ugrađene“ u jednu tonu CBAM proizvoda, a koje se mogu odrediti na dva osnovna načina:

- a) Primjenom tzv. **zadanih/defaultnih vrijednosti** koje su definirane za svaku zemlju izvan EU (tako i Bosnu i Hercegovinu), kao i za svaki tarifni broj CBAM proizvoda,
- b) Primjenom **izračunatih vrijednosti (actual data)**, pod uvjetom da su iste izračunate kroz

priladajuće izvješće o emisijama, a koje je **verificirala** organizacija koja za to ima **akreditaciju neke od zemalja članica EU**;

2. Drugi faktor je sama **količina uvezenih proizvoda**, odnosno količina koju je uvoznik/deklarant uveo u područje Unije u toku kalendarske godine;

3. **Besplatna dodjela emisijskih jedinica** je treći faktor čija je uloga – pojednostavljeno, u **umanjenju vrijednosti ugrađenih emisija**, bilo da su iste utvrđene izračunom ili da se koriste zadane vrijednosti. Svrha ove besplatne alokacije je omogućavanje da CBAM, u mjeri u kojoj je moguće, prati besplatnu dodjelu emisijskih jedinica koje smo spomenuli na početku ovog teksta, odnosno besplatnih dozvola iz ETS sustava;

4. **Cijena CBAM certifikata** („certifikat u elektroničkom obliku koji odgovara jednoj toni CO₂ ugrađenih emisija u robu”) je novčana vrijednost, izražena u eurima, jedne tone CO₂ emisija koje su utvrđene po CBAM regulativi. Sama cijena CBAM certifikata održava/reflektira cijenu **ETS dozvola** za određeno tromjesečje. Primjer – ako je uvoznik isključivo provodio uvoz u drugom kvartalu 2026. godine, prosječna cijena jednog CBAM certifikata će biti jednaka prosječnim i konačnim dražbovnim (aukcijskim) cijenama emisijskih jedinica iz spomenutog ETS sustava u tom istom kvartalu. Način izračuna cijene certifikata nakon 2026. će se donekle usložiti, ali će i dalje biti usko povezan s cijenama na ETS tržištu. Očekivana cijena jednog CBAM certifikata za 2026. godinu je u rasponu od **70 do 100 eura (trenutna cijena - 89.56 €)**.

Da bi utvrdili potrebnu količinu CBAM certifikata za jednu tonu CBAM proizvoda, ovdje ćemo se fokusirati na **defaultne/zadane vrijednosti** za nekoliko skupina proizvoda. Prikazani su proizvodi iz industrija koje su značajne za izvoz iz Bosne i Hercegovine:

KN oznaka	Opis	Zadane vrijednosti BIH	Besplatna alokacija - 2026	Konačne zadane vrijednosti - tona CO ₂ u toni proizvoda	Cijena CBAM certifikata *	Trošak CBAM certifikata po toni proizvoda uvezenog u Uniju
7308	Konstrukcije i dijelovi konstrukcija od željeza ili čelika	3,135	1,454	1,681	75,00 €	126,10 €
7318 22 00	Podloške od željeza ili	2,651	1,330	1,321	75,00 €	99,08 €
7228 30	Šipke od alatnog čelika	3,982	1,410	2,572	75,00 €	192,91 €
7616 91 00	Rešetke, mreže i ograde, od aluminijske žice	4,985	1,448	3,537	75,00 €	265,28 €
7214 20 00	Šipke, od željeza ili nelegiranog čelika, s udubljenjima, rebrima...	2,574	1,330	1,244	75,00 €	93,31 €
7604 21 00	Šuplji profili od slitina aluminijske	3,365	1,456	1,909	75,00 €	143,20 €
7605 21 00	Žica od slitina aluminijske	4,073	1,485	2,588	75,00 €	194,10 €
7610 10 00	Vrata, prozori i njihovi okviri te pragovi za vrata	4,093	1,456	2,637	75,00 €	197,80 €

* Prosječna cijena CBAM certifikata za 2025. godinu korištena je kao ilustracija. Stvarna cijena u 2027. bit će određena na temelju prosječne cijene ETS dozvola u kvartalu u kojem je izvršen uvoz 2026. godine. U tablici je prikazana prosječna vrijednost iz 2025. godine.

Sukladno prikazanim vrijednostima, uvoznici CBAM proizvoda će u 2027. godini – najkasnije do 30.9.2027. predati potrebnu količinu CBAM certifikata kroz umnožak uvezenih tona po pojedinoj tarifi sa zadanim (konačnim) vrijednostima CO2 po toni uvezenog proizvoda, čime će se dobiti potrebna količina CBAM certifikata, a čije je cijena, kako je ranije navedeno promjenjiva i odražava prosječnu cijenu ETS jedinica iz relevantnog kvartala u kojem je proveden uvoz.

Iz prikazanog je jasno kako se radi o značajnom smanjenju konkurentnosti domaćih proizvoda na tržištu Unije, a na koje je fokusirana glavnina BIH industrije.



Bitno je napomenuti kako BH proizvođači mogu smanjiti vrijednosti navedenih emisija kroz primjenu izračunatih vrijednost (*actual data*), na način da izrade **metodologiju i pripadajuće izvješće o emisijama**, ali takvo izvješće mora verificirati neovisna treća strana, odnosno **verifikator**. Posebnost same verifikacije je u tome što je Unija tek nedavno objavila Delegiranu uredbu kojom se

utvrđuju uvjeti za dodjelu akreditacije verifikatorima, tako da akreditacijske agencije zemalja članica Unije tek pokreću proceduru njihove akreditacije, što dodatno otežava planiranje verifikacije za domaće proizvođače. Također, sama verifikacija emisija za robu iz predmetne 2026. godine će biti moguća tek nakon proteka godine, odnosno od 2027. godine. Time je ostavljen relativno kratak rok između samog početka postupka verifikacije do predaje CBAM deklaracija, a što je u kontekstu CBAM-a dodatno otežano zbog potrebe da se verificiraju izvješća svih proizvođača u određenom lancu opskrbe.

Kada je u pitanju verifikacija, kao i same direktne emisije za čelik, aluminij i željezo, bitan utjecaj na vrijednosti glavnine BH prerađivača će imati njihovi dobavljači sirovina, čelika, aluminijska i sl. Da bi BH prerađivači imali izračunate stvarne vrijednosti emisija, potrebno je da su njihovi dobavljači CBAM sirovina, odnosno prekursora, koje koriste u proizvodnji, verificirali vlastiti CBAM izvještaj. Alternativa za verifikaciju dobavljača je korištenje zadanih vrijednosti za zemlju porijekla sirovine, a što podrazumijeva postupak verifikacije samog prerađivača iz BIH, uz korištenje zadanih vrijednosti za njegove dobavljače.

Dodatno, suprotno uvriježenom mišljenju, za domaću industriju čelika i aluminijska, električna energija, kao i emisijski faktor Bosne i Hercegovine, **ne utječu na vrijednost direktnih emisija**. Sama električna energija, kao i emisijski faktor Bosne i Hercegovine, utječu na **indirektne emisije**, a koje se primjenjuju samo na CBAM proizvode iz skupine cementa i umjetnih gnojiva prilikom obračuna CBAM certifikata.

Kada su u pitanju aluminij, čelik i željezo, financijski trošak proizlazi isključivo iz **direktnih emisija**, odnosno emisija CO2 koje su posljedica izgaranja raznih goriva, plinova ili procesnih emisija. U većini slučajeva se radi o emisijama koje nastaju izvan Bosne i Hercegovine, u

čeličanama ili postrojenjima za proizvodnju aluminijskih trupaca, ingota, itd. Međutim, sve emisije u lancu proizvodnje, počevši od bazičnih CBAM sirovina do složenih proizvoda, ulaze u izračun direktnih emisija.

Ono što dodatno otežava poziciju za domaću industriju je činjenica da je Komisija uvela fazno povećanje zadanih vrijednosti za nadolazeće godine – 10% za 2027. i dodatnih 10% za 2028., uz istovremeno smanjenje besplatnih alokacija, a što domaću industriju dovodi u nezavidan položaj.

Kada je u pitanju **električna energija kao proizvod**, odnosno izvoz električne energije u cjelini, imamo još nepovoljniji položaj domaćih elektroprivreda, budući da kod električne energije ne postoje besplatne alokacije, jer iste nisu dostupne ni za EU proizvođače. Na električnu energiju iz BiH će se primijeniti nacionalni emisijski faktor koji se temelji na podacima dobivenima od Međunarodne agencije za energiju (IEA), a isti je sadržan u Prilogu III. Provedbene uredbe (2025/2621) i iznosi 1,148 za BiH, a što je u slučaju cijene CBAM certifikata od 75 eura, opterećenje **od 86,1 € po MWh** energije uvezene u područje Unije. Uvjeti za pojedine proizvođače električne energije iz obnovljivih izvora energije, a koji ukupnu proizvodnju izvoze na tržište Unije, za primjenu stvarnih vrijednosti, su relativno složeni i zahtijevaju koordinaciju nacionalnih operatora sustava i verifikaciju akreditiranog verifikatora.

Preporuke za domaće proizvođače:

- Identificirajte jesu li vaši proizvodi na popisu CBAM proizvoda,
- Kontaktirajte svoje uvoznike/kupce u EU o njihovim obvezama (CBAM deklaranti),
- Počnite prikupljati podatke o direktnim emisijama CO₂ u svojoj proizvodnji, kroz pripremu metodologije i draft izvješća o emisijama,
- Povežite se s dobavljačima kako biste razgovarali o njihovim CBAM izvješćima i verifikaciji.

Zaključno, nakon više od dvije godine prijelaznog perioda, dio domaće industrije se nalazi pred velikim izazovom da bi zadržao konkurentnost. Ključni korak svih domaćih nivoa vlasti u narednom periodu mora biti pronalazak odgovarajućeg **rješenja za ublažavanje posljedica CBAM-a**, uz objektivne i lako dokazive kriterije. Jedan od potencijalnih modela može biti ranija praksa Vlade FBiH koju smo imali kod **ublažavanja posljedica povećanja minimalne plaće**, a što bi podrazumijevalo refundaciju dijela troškova koji su nastali zbog smanjene konkurentnosti.

Dodatni prostor za domaća tijela za poboljšanje pozicije Bosne i Hercegovine je i u zahtijevanju **smanjenja pojedinih vrijednosti** koje su utvrđene za Bosnu i Hercegovinu. Imamo cijeli niz nelogičnih rješenja za određene skupine domaćih proizvoda koje su stavljene u nepovoljniji položaj prema ostalim zemljama koje predstavljaju konkurenciju proizvođačima iz BiH na tržištu Unije, te je od ključne važnosti uspostava odgovarajućih kanala komunikacije prema Komisiji EU za poboljšanje konkurentnosti BH industrije.

Vinko Mikulić, član Udruženja poslodavaca u FBiH i Ekonomsko-socijalnog vijeća za teritoriju FBiH

Poziv poslodavcima za učešće u validaciji standarda zanimanja



Udruženje poslodavaca u FBiH u saradnji sa Međunarodnom organizacijom rada (ILO), u okviru projekta „EU podrška unapređenju kvaliteta stručnog obrazovanja – EU za obrazovanje i zapošljavanje“, poziva poslodavce da učestvuju u validaciji standarda zanimanja za prioriteta zanimanja u Bosni i Hercegovini.

Zašto je ovo važno za poslodavce?

Vaše učešće omogućava da se budući radnici obrazuju u skladu sa stvarnim potrebama tržišta rada. Validacijom standarda direktno utičete na vještine i kompetencije kadra kojeg zapošljavate – uz minimalno ulaganje vremena.

Zanimanja u prvom krugu

- Elektrotehničar energetike (sa elementima obnovljivih izvora)
- Električar elektroinstalater (sa elementima obnovljivih izvora)
- Tehničar mehatronike
- Turistički tehničar

Svi standardi su izrađeni isključivo na osnovu potreba poslodavaca.

Šta se postiže validacijom?

Validirani standard zanimanja:

- jasno definiše radne zadatke, vještine i ishode učenja,

- predstavlja osnovu za buduće standarde kvalifikacija,
- doprinosi kvalitetnijem stručnom obrazovanju i većoj zapošljivosti mladih.

Ko se može uključiti?

Poziv je namijenjen:

- poslodavcima koji zapošljavaju ili planiraju zapošljavanje u navedenim zanimanjima,
- vlasnicima firmi, direktorima, HR menadžerima, rukovodiocima i stručnjacima iz prakse.

Kako učestvovati? (≈ 20 minuta)

Posjetite: <https://eu4education.ba/standardi-zanimanja/>

Odaberite zanimanje relevantno za vašu djelatnost

Kliknite „OTVORI” i popunite online upitnik

Ocijenite važnost i učestalost poslova i vještina

Predložite izmjene ili nove vještine, ukoliko je potrebno

Učešće u narednim fazama razvoja novih standarda zanimanja

U 2026. godini planiran je razvoj standarda za dodatna zanimanja iz oblasti energetike, IT-a, građevinarstva, turizma, zdravstva te zelene i digitalne tranzicije.

Poslodavci mogu iskazati interes za učešće u radnim grupama putem prijavnog obrasca: <https://forms.office.com/e/3XdN4eygX9>

Lista svih planiranih zanimanja dostupna je na web-stranici projekta.

Za dodatne informacije: eu4education@ilo.org

Radujemo se vašem učešću i doprinosu razvoju obrazovanja u skladu s potrebama privrede u Bosni i Hercegovini.

Cijene za 63 proizvoda zaključane do prvog marta



Vlada Federacije Bosne i Hercegovine je, na prijedlog Federalnog ministarstva trgovine, donijela Odluku o mjerama neposredne kontrole cijena od 01.01.2026. do 01.03.2026. kojom se produžava mjera zaključanih cijena osnovnih prehrambenih i higijenskih namirnica.

Odluka je donesena s ciljem nastavka zaštite životnog standarda građana i očuvanja stabilnosti tržišta osnovnih životnih namirnica.

Odlukom je obuhvaćen spisak od 63 proizvoda, uz određene korekcije u skladu sa aktuelnim kretanjima na tržištu. Naime, zamjensko mlijeko za bebe uklonjeno je sa spiska zaključanih cijena, budući da je u proteklom periodu došlo do drastičnog povećanja njegove nabavne cijene, što je onemogućilo daljnju primjenu ove mjere bez poremećaja u snabdijevanju.

Također, izvršena je korekcija cijene jaja, koja je u odnosu na cijenu utvrđenu početkom godine povećana za dvije konvertibilne marke, uvažavajući rast troškova proizvodnje i nabavke ovog proizvoda.

Spisak proizvoda možete vidjeti na linku Ministarstva trgovine: <https://www.fmt.gov.ba/component/k2/cijene-za-63-proizvoda-zaklju%C4%8Dane-do-prvog-marta.html>

Nova članica UPFBiH - Poliklinika Atrijum



Poliklinika Atrijum Sarajevo počela je sa radom 1998. godine. Kao jedna od vodećih i najopremljenijih privatnih poliklinika u Sarajevu, brinu o zdravlju mnogobrojnih pacijenata. Zadovoljstvo pacijenata Poliklinike ogleda se u broju zdravstvenih kartona koji danas prelazi cifru od 60.000.

Poliklinika Atrijum je prva privatna poliklinika u Bosni i Hercegovini koja je uvela usluge u oblasti porodične medicine gdje osiguranici Zavod zdravstvenog osiguranja Kantona Sarajevo mogu potpuno besplatno obavljati sve usluge baš kao što su radili u dosadašnjoj praksi, samo u državnim porodičnim ambulantomama. Tim Poliklinike sačinjavajuiskusni i priznati medicinski stručnjaci koji su prepoznati kao jedni od vodećih stručnjaka u svojim oblastima kako u BiH, tako i u inostranstvu.

Više o Poliklinici pročitajte [OVDJE](#).



UDRUŽENJE POSLODAVACA

UDRUŽENJE POSLODAVACA U FBiH
MARŠALA TITA 6, 71 000 SARAJEVO

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba